

20 NOV 2001
Agong-Kritikal
YANG DI-PERTUAN AGONG KRITIKAL TETAPI STABIL

KUALA LUMPUR, 20 Nov (Bernama) -- Yang di-Pertuan Agong Sultan Salahuddin Abdul Aziz Shah kini berada dalam keadaan kritikal tetapi stabil di Pusat Perubatan Gleneagles Intan, Jalan Ampang di sini.

"Menurut pakar-pakar perubatan yang sedang merawat Seri Paduka, Seri Paduka kini dalam keadaan kritikal dan memerlukan rawatan rapi. Tetapi Seri Paduka masih dalam keadaan stabil," menurut satu kenyataan Istana Negara yang ditandatangani Datuk Pengelola Bijaya DiRaja, Datuk Ishak Ahmad hari ini.

Sultan Salahuddin menerima rawatan lanjut di pusat rawatan itu sejak Ahad lepas setelah menjalani rawatan kesihatan hampir dua bulan di Hospital Mount Elizabeth di Singapura.

"Rakyat jelata dipohon agar dapat bersama-sama berdoa ke hadrat Allah SWT untuk keselamatan dan kesejahteraan Baginda Tuanku supaya kesihatan Baginda pulih seperti sediakala," kata kenyataan itu.

Antara pembesar yang menziarahi Seri Paduka hari ini ialah Sultan Perak Sultan Azlan Shah dan Raja Permaisuri Perak Tuanku Bainun, Raja Muda Perak dan Pemangku Raja Selangor.

Semalam, Seri Paduka diziarahi oleh Timbalan Yang di-Pertuan Agong Sultan Mizan Zainal Abidin dan Permaisuri Nur Zahirah, Yang Dipertuan Besar Negeri Sembilan Tuanku Ja'afar dan Tuanku Ampuan Najihah, Perdana Menteri Datuk Seri Dr Mahathir Mohamad dan isterinya Datin Seri Dr Siti Hasmah Mohd Ali.

Yang turut menziarahi Seri Paduka ialah Menteri Besar Selangor Datuk Seri Dr Mohamad Khir Toyo dan isteri Datin Zaharah Kechik.

Seri Paduka terus menerima kunjungan kerabat-kerabat diraja petang ini antaranya adinda baginda Tengku Besar Putra Azam dan Tengku Mahkota Pahang Tengku Abdullah Sultan Ahmad Shah.

Sementara orang kenamaan yang turut menziarahi Seri Paduka petang ini terdiri daripada Ketua Hakim Negara Tan Sri Dzaidin Abdullah, Menteri Pembangunan Wanita dan Keluarga Datuk Shahrizat Abdul Jalil dan Panglima Angkatan Tentera Jen Tan Sri Mohd Zahidi Zainuddin.

Pada pukul 5.30 petang anakanda baginda Tengku Idris dan Tengku Sulaiman kelihatan meninggalkan hospital dan 10 minit kemudian Seri Paduka diziarahi oleh Mufti Besar Selangor Datuk Seri Utama Diraja Haji Mohd Tamyas Abdul Wahid.

-- BERNAMA
AN HK ZS PR